

汪氏小宗譜卷四目

樂敘堂記

武林祠堂記

正儀堂說

葬祖誌

黃峯公暨配舒孺人合葬誌

文宇公暨配葉孺人合葬誌

淑佩公暨配吳安人合葬誌

公聘公暨配吳孺人附葬誌

育青公元配胡夫人暨植遠公並配王孺人昭遠公並配張

孺人神像誌

蓉垞公殉難誌

蓉垞公配關宜人殉難誌

子惠公配朱孺人暨子與公配朱孺人殉難誌

十村公遺訓

小米公崇祀鄉賢錄

子惠公配朱孺人子與公配朱孺人節烈錄

572920  
n. 9, 1939

樂敘堂記

思齊公撰

樂敘堂者我宏村汪氏之家祠也曩余運粟西京王事鞅掌家

食弗遑既歸而堂適成董之者蓋余內子胡暨兒輩仕和仕隆

也時縣尹黃公

諱彪

江西之臨川人

永樂七年任縣縣嫉惡揚善卒於官莫不灑淚見本縣名

志與余有舊一日過余因止而觴之請為祠堂作記黃公曰烏

乎記余避席起謹述祖德而告之曰吾家仁雅公由歛唐模遷

縣之北鄉署名祁墅居六世至我彥濟公秉性仁厚孝友著聞

鄉黨宗族無閒言而公常欲然不自滿足敦善不怠宋高宗時

遭張寇兵燹所居宅三百餘間盡成焦土始紛紛議遷徙而我

公遂來居此土僅父子數人耳數傳而後日振振然歷元及明

子孫漸盛登斯堂者昭穆一家出入一門也余觀斯堂之始構鳩工庀材審曲面勢度諸地必寬度諸木務巨雖敦尙渾堅不施華采而詩所稱殖殖其庭噲噲其正噦噦其冥則誠有之或者我子孫他日之必昌而熾不如是不足以有容耶堂之上有樓相與登而望之則諸峰外峙半鏡中涵山色水光相映爽氣拂拂從襟袖閒至祖宗木主在坐其靈若來黃公曰休哉所以妥其先者得矣余曰始卜築時陰陽家贈之券言謂子孫其逢吉吾未敢信黃公曰烏有敦善行不求人知而其後之人不碩大蕃衍者哉堪輿以數合理正未有艾書云考作室厥子乃弗肯堂今之有斯堂也宜其子子孫孫歌于斯哭于斯聚族于斯

秩敘羣倫永履和樂則今日所以命斯堂之意也夫余曰誠哉是言當以告後人黃公曰噫矣又烏乎記余遂援筆而書之家乘之簡末

思齊公號景齋佳一公子永樂初以頃稅舉賢才授山西運粟主簿因久宦晉省以家政付德配胡孺人諱董理且囑擇地建造宗祠而署曰樂敘堂并爲之記所以妥先靈者至矣景泰二年春孺人示子孫遺囑以體祖宗詒翼之艱撫愛之意孝敬恭順垂裕後昆兄弟以怡悅爲先婦職以事姑爲孝戒勉之意至周且備觀公之記則公之品誼已見考孺人之行事則孺人之賢德益彰詩云刑于寡妻至于兄弟以御于

家邦其殆我公與我孺人之謂與  
節錄家傳

武林祠堂記

余家世居徽郡黟邑之宏村自文字公由明季始遷杭州  
淑佩公繼世相居猶歲歲往復於徽杭間迨國朝高伯祖  
公聘公高祖育青公同入錢唐學遂隸籍其時馬鬣未封牛  
眠未卜育青公重趺山谷覘穴尋龍獲吉壤西湖之武林曰  
龍門山曰蓮華峰曰徐家山曰傅家山復自營生壙於瑞雲山  
凡五所皆屬武林之支幹並於靈鷲峰側得隙地建立莊舍避  
風雨會飲食以爲墓祭休息之常世遠年湮屢脩屢圯義目擊  
傾頽亟思脩葺然亦不敢廣侈墓壙張皇塋宇仍其舊址改作  
新觀建造祠堂供置神位禮有百世不遷之宗百世不遷者別

子之後也宗其繼別子之所自出者百世不遷者也別子謂公子繼別子者族人尊之謂之大宗 文宇公爲遷杭郡之始祖古之別子也百世不遷也設一位 淑佩公 公聘公繼別子者也百世不遷也設一位 育青公續承先業垂裕後昆又身受二品封誥從大夫立宗之例設一位 曾叔祖楨遠公 昭遠公雖無後而同壤設一位 曾伯祖定遠公暨 曾祖德遠公雖不同壤合均塋從祖之例設一位新安代隔禮攸難親按昭穆以嚴祭追遠之事也別設一位 藥不揣樸愚力緝德薄偕宗長兄漢與同族子姓酌古斟今徧諮走訪經營量度鳩工庀材肇始於乙巳春二月落成於丙午冬十二月爰額其堂曰聚

斯所以聚族而保墓也蓋余家占籍以來歷十有二世二百餘年矣椒聊蕃衍螽斯振繩戚戚孔昭親親以睦當春秋之享念陟降之神展墓妥靈也設廟崇貌也合族以食序以昭穆別之以禮義收族也躋斯堂者尙其鑑諸道光戊申三月二十七日七世孫夔謹誌

正儀堂說

周品公撰

萬歷癸巳歲余同堂兄弟繼祖父志謀構家祠乙未春工既成屬家之兄弟子姪燕飲以落之而大署其堂曰正儀或請其說余應之曰禮儀三百威儀三千經曲之文彰明較著而正之爲言則又率履不越之義也昔者孟僖子從魯公如楚不能相儀歸而悔之是知人而無禮猶瞽之無相俛俛乎何之禮之於人誠不可以已也記曰道德仁義非禮不成教訓正俗非禮不備夫禮有本有文無本不立無文不行忠信禮之本也儀節卽禮之文也吾願登斯堂者相勉於孝慈而父子之儀不乖相砥於敬愛而兄弟之儀不愆亦卽移孝作忠信交遊而協琴瑟而君

臣朋友夫婦之儀無不整齊而嚴肅至若家廟之中貴多貴少貴素貴文觀其會通行其典禮肉乾人饑不敢食酒清人渴不敢飲而儀非繁縟筐筥錡釜可以薦蘋蘩藟藻可以羞而儀非簡略從乎彰身而言則折矩周規進抑退揚而其儀可象從乎作事而言則循理守度執玉捧盈而其儀足法郁郁彬彬典型斯在而成德行者於斯正風俗者於斯又何疑三千三百之多而率履之爲難哉詩曰其儀不忒正是四國其斯之謂與因書之以告吾同堂兄弟子姪而著爲正儀堂說

周岳公字啟明號震陽天六公長子周晟公同祖弟也爲明鄉飲大賓先是伯演公有座右銘曰天下無難化之人與人

時須要三個必自反天下無難處之事臨事時當思兩個如之何併囑後嗣佩服勿忘萬歷間周岳公偕六房弟姪繼祖父之志協力營構家祠顏曰正儀堂卽以伯演公座右銘書爲楹帖俾後世子孫奉爲楷模至今因之

節錄家傳

葬祖誌 育青公撰

英自幼 先慈見背荷蒙 先君教育以明經濫廁京屬末秩

需次待銓竊謂邀升斗之祿少盡烏養之私豈意辛酉歲遭

先君之變三年服闋因思 先君而上三代尚在淺土未能盡

孝安能作忠早夜自思惟以卜兆爲急務於是或覓穴於黟山

或尋龍於浙水幸荷神佑均得入土康熙二十九年庚午夏

曾祖考妣卜葬於新安休邑之石壁山康熙三十四年乙亥秋

先考妣卜葬於靈隱之蓮花峰康熙三十六年丁丑春 先

祖考妣又自黟而遷浙卜葬於龍門山 英雖不克顯揚以繼志

庶幾無媿於爲人孫子矣乎嗣後春秋展奠當思營建之惟艱

孫子繁昌爰識休祥之有自用垂不朽以示來茲

黃峰公暨配舒孺人合葬誌 育青公撰

曾祖考諱邦奇號黃峰 高祖周晟公長子世居黟邑宏村元

配 曾祖妣黃氏諱員弟早卒無出葬於口山繼配 曾祖妣

舒氏諱翠英生子二長 伯祖諱元始公次郎 先祖諱元台

公也 曾祖考孝友傳家 曾祖妣幽嫺賦性素為鄉黨所推

重俱以壽考終合厝於本村後山 伯祖舉子四人俱相繼先

逝 祖考生我 伯父元宰公暨我 先君淑佩公以先人尙

在淺土寢食不安偕長房孫 宏基 延地師吳徵明徧閱高原至

休邑得一地名曰架上金盆彼時疑信相參遂爾中止結壙以

驗其臧否迨 先君謝世諸兄又復淪亡責任在 英 若再蹉跎

將來子孫眾多人心不齊彼此推諉歸土無日矣亟請諸名師徧訪葬地僉云牛眠吉壤君已得之休邑石壁山矣何爲舍之而他求耶遂開向日所結之壙見其土具五色細膩倍常所藏諸物依然如故英意始決用爲宅兆惟祈生順死安諸姪亦鑒余心之公並無異議爰是捐資營建偕姪體仁自武林回里與長房國玳諸姪扶曾祖考妣柩至休邑安葬於石壁山之陽其時則康熙二十九年庚午四月二十一日午時也其穴則卯龍入首甲山庚向加寅申分金也既葬之後恐來龍并墓傍地被人侵損英復捐資購買俾先靈安寢於九原子孫永保於百世英豈敢以繼述自居祇以盡子職之當然爾

文宇公暨配葉孺人合葬誌育青公撰

先祖考文宇公 曾祖考黃峯公次子也生於黟邑宏村賦質聰穎屢試不售因廢舉業從事鹽筴偕 祖妣葉孺人卜居武林焉其時 伯父元宰公暨 先君淑佩公協同經營家業丕振崇禎己卯春 祖考歸里展墓遘疾不起於九月溘焉長逝

伯父 先君因生計在外治喪畢仍至武林歲甲申擇期舉

祖考殯侍 祖妣回新安 祖妣因念墳墓家園俱在黟地

不欲來杭畱居故土至戊子歲十月辭世合厝於黟邑深壙之

陽 伯父 先君延地師至新安訪覓吉壤數十年來機緣不

偶相繼資志而終英思 伯父 先君兩支全家在浙歲時伏

臘不能躬親祭奠期卜葬於西湖兩峰之間始得少展孝思不  
憚寒暑徧歷名區丙子夏偕族弟瑞旭訪至靈隱之龍門山見  
有龍氣蟠結水繞砂環可稱吉穴者復延江右名師楊聖瑞再  
三審顧亦云牛眠吉壤於是不惜重費購買以定窀穸焉是年  
冬英至新安於十一月十八辛未日啓攢奉祖考妣靈柩來  
杭山路崎嶇水道淺涸幸叨神佑皆獲平安季冬朔舟抵江干  
次日未時權厝於形勝山今歲丁丑爲康熙之三十六年山向  
大利謹卜於三月初三日未時奉柩詣龍門山安葬先於孟春  
諏吉開工維時雨雪連綿艱於營造英早夜焦思虔心默禱至  
葬期前後數日忽大晴霽歷經三月有餘始克蕝事嗣後春露

秋霜世世子孫栢捲無缺一以慰祖考祖妣地下之靈一  
以繼伯父先君仁孝之志英自新安扶柩至杭及葬事諸  
費不下二千餘金俱一人獨任惟願祖澤廣敷均蒙庇廕孫枝  
繁衍永享簪纓英亦可無忝於承先啓後之責也已

淑佩公暨配吳安人合葬誌

有青公撰

英爲先人卜兆幾歷春秋康熙甲戌夏有友戴星侯者善地理爲英覓地於梵村約二十餘畝古木蔥蘢果堪入目遂擇吉營建但向者樹木陰翳美惡未辨及開山立穴後朝向頗覺巖頭英方在躊躇之際適有族弟瑞旭堪輿精妙力阻此舉且云蓮花峰厝基誠爲牛眠吉兆奈何舍彼而就此耶因而梵村之舉中止乙亥夏蓮花峰山向大利謀之劍邑名師楊聖瑞彼力勸之曰有此吉壤何不及早歸土今兩山中無復有此地矣其時表姪壻傳升虞亦竭力贊襄楊君因定一穴與舊時厝基稍上數尺過左一棺土色更覺細潤紅黃炫目擇於七月十三日辰

時奉柩安葬焉時康熙三十四年歲次乙亥也英不避炎暑日  
夕山中躬親畚鍤閱三月而告成今者馬鬣鬼峩星峰聳翠水  
繞沙環四方來觀者莫不羨曰此汪氏佳城也異日子孫繁盛  
奕世榮昌可操券而得矣英聞之不勝欣然慰而因有感於楊  
君之鑒定傳子之贊助瑞弟之舍彼而取此三人相與以有成  
也

公聘公暨配吳孺人耐葬誌育青公撰

先兄諱如珍字公聘先考純庵公長子也幼稟異資不作兒

戲長就外塾好學無倦容與英友愛無閒饒有推梨讓棗之風

承歡膝下極得考妣心而考妣亦最鍾愛迨先妣

辭世兄年甫十四哀痛無時居喪盡禮三年服闋與英應童子

試同受知於學使者補錢邑弟子員嗣後益下帷攻苦共相砥

礪圖上進以榮親孰意兄賦質孱弱誦讀過勞漸至成疾順治

甲午屆賓興大典兄猶欲應試奈疾勢已入膏肓至試期而不

復能起矣先兄之好學敦倫如此至於精書法擅丹青工鐵筆

特其餘事焉耳娶先嫂吳氏爲歙縣璞舍公長女夙嫻圖訓歸

我先兄克盡婦道維時 先考方娶 繼妣梁孺人先嫂絕無異視故事舅姑並以孝聞處妯娌從無閒言相夫子先意承志善於曲體當兄病篤之際親嘗湯藥衣不解帶者月餘迨易簀時痛不欲生強起成服治喪每歲伏臘忌辰猶悲痛如初越數年 繼妣復以疾終先嫂親操家政上奉蘋蘩下理中饋豐儉各得其宜然以憂鬱成疾至戊申歲以舊疾卒同祔葬於徐家山之陽 繼妣梁孺人墓側先兄嫂早逝無出 英 以長子 鎮 爲其後爰爲略敘生平用垂不朽之意云

青青公元配胡宜人暨楨遠公並配王孺人昭遠公並配張孺人神像誌 德遠公撰

先妣胡氏乃 先君素庵公之元配系出虎林望族外王父我生公第三女也生而嫺靜年十六來歸事舅姑以孝相夫子以敬處妯娌以和待婢僕以慈年僅二十而逝康熙庚申歲以

恩例贈安人祔葬徐家山之陽 繼祖妣梁太君墓左側繼配吾 母馮安人生子四三卽楨遠弟四卽昭遠弟三弟楨遠諱標幼聰敏好讀書於古大家文辭無不淹洽年十七補仁和縣學弟子員下帷攻苦潛心力學是年冬會選 恩例貢入

大廷授學博甲子科聞卷呈堂因額隘致遺遂抑鬱不舒

患脇痛之症丁卯猶欲應試 先君慰之曰功名身外物宜養  
身以有待卽俟來科未晚也自是稍寬舉業或留心詩賦寄情  
山水閒以繪事摩古人筆意亦極酷肖然暇時仍手不釋卷又  
惟恐以疾遺親憂每問之必以平復對而不知漸入膏肓矣庚  
午夏悉將生平所作文藝及纂輯麟經講章手錄裝演成帙曰  
此吾一生心血不忍棄置耳越數日端坐而逝弟婦王氏爲新  
安聖木王公第三女年十八歸于弟相敬如賓有梁孟風迨弟  
歿誓以身殉勺水不入口者數日勸慰再三稍進飲食然哀毀  
過情遂致成疾三年喪畢竟相從於地下矣四弟昭遠諱煥資  
稟聰慧過目成誦幼善病然年少初不介懷孰意壬申夏一病

不起臨終之際見一老僧接引遂手持念珠作偈而逝非具宿  
根者而能若是乎弟婦張氏乃西泠東銘張公之次女年十七  
來歸凡事無不曲體弟意當弟卧疾時親嘗湯藥飲食俱廢及  
弟辭世適懷孕三月其絕食而欲以身殉者一如三弟婦焉尊  
長諭以全孤大義故不卽從地下十一月生一男謂可延息未  
幾痘殤自是意決絕矣至甲戌夏遂以疾終 先妣胡孺人生  
於前明崇禎丁丑十月十九日午時卒於 國朝順治丙申十  
二月十一日申時三弟植遠生於康熙乙巳六月十七日卯時  
卒於庚午七月十三日巳時三弟婦王氏生於康熙甲辰十二  
月十一日卯時卒於癸酉六月二十六日午時四弟昭遠生於

康熙癸丑十一月二十九日申時卒於壬申四月二十六日未時四弟婦張氏生於康熙甲寅六月十六日辰時卒於甲戌五月十四日酉時皆合葬於朱家鵝傳家山之陽謹將先妣暨兩弟并弟婦生平大概略序其端俾世世子孫得諗一二云

蓉垞公殉難誌

先考幼失怙長病重聽遂廢舉子業從烏程費曉樓山人丹旭遊通畫理山水人物酷肖其傳工詩有餘閒虛室稿二卷燬於賊填詞習隸其餘事也道光癸卯秋遭大母喪哀毀骨立居常茹素者十年初與伯叔輩居錢塘之古驛後孝友無間言後以子姪眾多析居仁和之義和里有園曰蔭園時與名流觴詠其中一如東軒吟社故事東軒爲先世雅集之地園以蔭名承先志也咸豐初粵氛滋亂先考與世父少洪公目擊時艱連年輸餉奮不顧家迨癸丑秋少洪公卒先考望斷雁行筆墨都廢丁巳命不孝納粟之官楚北已未冬不孝隨羅澹村

方伯之浙江巡撫任得省親於里第庚申春粵匪突至城陷卽復幸出於難而家貲落矣先考乃論不孝曰爲貧而仕汝其再作楚游我有爾弟侍奉汝母憂不孝固請就養先考以九世廬墓所在堅不允及秋又促不孝行不敢違命涕泣就道官楚歲餘於宜昌差次聞杭城再陷亟請假尋親行及武昌而訃至先考於同治元年壬戌五月二十七日與先姊同殉難武林門外之米市巷不孝呼天搶地欲入寇地不得進癸亥夏洪張伯侍御昌燕以事奏聞奉旨給雲騎尉世職襲次完時給予恩騎尉罔替入祀昭忠祠甲子春浙省全復不孝馳赴杭州徧詢父老負骨末由不得已謹

於乙丑夏閏五月二十七日巳時具衣冠以招魂葬於靈隱之大桐塢先姊適錢邑庠生湯煥奎爲室生子一殤舅姑先後死於難煥奎字崙伯號閭峯又殉難於錢塘之留下山年俱三十有六同治七年戊辰夏六月男曾唯謹誌

先妣諱華字芳友仁和國學生佑之關公第四女也年二十一

來歸我先考我先考有重聽病不問家事事無鉅細先

妣主之禮無不中三十年來先考得寄情於湖山托興於翰

墨者 先妣之助也辛酉之難室家離散 先妣行至紹興遇

姪關寅伯光穀遂同避寇諸暨之江藻明年夏六月寇至先

妣不食而死不孝在鄂聞訃星夜奔往賊氛阻進癸亥春紹興

克復得至喪次問之陳姥始識葬所收骸滴血血沁入骨以他

骨試之不然遂改殮厝於上虞之松厦乙丑夏不孝扶柩回籍

與先考合葬於大桐塢丁卯秋馬穀山中丞新貽以浙省紳

民殉難事入 奏奉

旨入祀節義祠江藻之厄同殉難者關光鼓並其妻顧氏其弟媳朱氏載坤之室也其妹蕉琴善丹青工詩詞爲 先考之女弟子適同邑金容如年十八而寡苦節二十五年與其媳許氏罵賊死 唯就江藻之嚴山收骨而葬焉同治七年戊辰夏六月男曾唯謹誌

子惠公配朱孺人暨子與公配朱孺人殉難誌

咸豐十年庚申春二月十有九日粵逆自廣德至圍八日而省城破越七日張壁田軍門玉良統兵抵武林賊聞風遁是厄也錢邑爲尤烈維時 先叔母 先嫂居古驛後之振綺堂聞城陷 先叔母投井死媳徐氏先以三齡子松年置之水氣絕乃自縊爲鄰人救免次女適孫氏僑寓婺郡歸甯在室先令十二齡女敏姑自縊繼將三齡子永齡投於池從容自經於芝庭之後園 先嫂焚香整衣偕嫠婦陳氏亦同縊焉 先叔母系出原任廣東糧儲道嘉興穎艘朱公達吉之女道光乙未秋 先叔子惠公卒以遺腹得弟曰曾事 先嫂歸安訓導同里朱次

膺先生瑞楷之長女也年十七歸我先兄子與兩載而先兄歿以守正長子繩年爲後又死於辛酉之難今以會事長子鼎年嗣之當冠退之日余偕曾復會事兩弟親爲改殮奉先叔母之柩合葬橫山鳳凰岡麓先嫂之柩合葬橫山楊家嶺丁卯冬同奉  
旨入祀節義祠同治十年辛未秋九月曾唯謹識

十村公遺訓

自汝祖棄養後我意興日消精神日敗萬一一旦委化無一言半語以畱示諸子汝等幼弱又無結實可靠之人何以成立上則負罪於祖父下難放心於汝輩用是從今日始暇時輒書數語不分頭緒亦無先後有見卽書在於汝等之尋繹至於聽與不聽我不能爲政矣嘉慶十有九年歲在甲戌二月朔十村居士記

我無大志不過要汝等兄弟都有飯喫和氣度日而已讀書固佳能管理家務亦好若游手好閑不務正業卽敗類也  
汝等兄弟五人須互相照應不可略分彼此倘或各樹旗鼓抑

或稍有私心外人離間之端從此而起此敗微也不可不知  
居家以儉爲第一要着大約由儉而奢易由奢而儉難切不可  
聽人說某家如此也要學他如此我們須做我們的人家一切  
起居服食與夫酬應交接居家紅白等事要得儒素氣象況汝  
等弟兄五人將來分析卽覺單薄尤要比汝 祖父時格外節  
儉方好  
兒女定親不可高攀門戶爲女擇婿人家自然要好些兒子定  
婦祇要杭城舊家有闔教者爲妙家業差些不妨祇要不受累  
而已總之擇婿娶婦斷不可暴發跡及做衙門二項人家卽鹽  
商亦要斟酌甯以不定爲妙

我們人家除開當外別無一事可做但我識見卓定無人向我  
引誘汝年輕心活必有人向汝引誘或誘汝做別樣生意說得  
天花亂墜或誘汝囤何貨物說得賺錢數倍此等說話斷斷不  
可理他此何時耶看得十分穩妥尙有差池況大意乎凜之凜  
之

人家生子無論智愚總要教他讀書一以拘其身體一以化其  
氣質也至廿歲以後能讀書者讀書不能讀書者管生意管家  
務皆是緊要之事切不可使之閑蕩蓋子弟一切不好處皆從  
一閑字生出也

以後諸事務宜收束場面以靜爲主以儉爲要無論紅白等事

切勿好扯排場勿似汝 祖汝父之時卽如夾牆巷孫宅從前如何闊大家業漸漸消敗自康成去世爽初弟兄二人頗安靜節儉所以立腳得住至於我家各房鼎奏二伯大得持家之道急宜取法

汝等若能從科甲出身做官是榮祖耀宗不然有碗飯喫勿妄動做官之念

處我家境界勤儉之外待人尤以謙抑爲先如此方可自守婚嫁以省儉爲主一應首飾衣服等項都要將就迎娶行人以四十千爲率吉期請客一日廟見雅席一日其饌房等繁文概從刪去不可視爲逆耳之談也

我百年大事一應附身附棺之事自應遵照舊章但有數語預爲汝等言之五七祇許延僧勿請道士神主孝子自黥勿勞顯者抑或寫主時一直書寫亦可其一應鋪排之事概從減省行人祇宜簡淨不必誇多陪弔但請親友勿延疏客以及撰行狀飾儀從等事概行禁止

大父十村公遺訓原本向存長房次房各敬錄一冊劫後不獲再讀乙亥春三月訪子栗十弟於潯江談及 先人持家之法出以示余曰 祖訓今尙在也謹錄十一條列入小宗譜世世子孫其敬聽之光緒二年丙子夏六月曾唯識

崇祀鄉賢錄

頭品頂戴浙江巡撫臣譚鍾麟謹

題爲公舉入祀鄉賢祠恭疏具

題仰祈

聖鑒事查接管卷內據布政使任道鎔詳稱據杭州府知府龔嘉雋詳據署錢塘縣知縣周雲章詳據前江西鹽法道吳兆麟等呈稱竊惟停澆激薄觀感洽於鄉閭經明行修典型垂於後嗣惟德之及人也遠故名之闕世者長欲闡幽光宜崇食報茲查已故內閣中書汪遠孫幼稟異質長勵純修既登孝廉之科旋効綸誥之職循陔

東哲念明發而遠歸侍疾中郎顓神靈而請代聞雞視  
寢剖鯉承歡孝哉之稱翕然無間迨乎抱終身之慕敦  
式好之情崔孝子之門庭弟昂肅穆馬文淵之訓誠賢  
聖襟期

國計民生在野常縈隱抱義漿仁粟立志惟慕古人修族  
譜以篤宗支設家塾以培寒畯貧宗賴其炊舉素士仰  
其錢通豐於遇人儉以律己可謂財輕簞籜義重蒿衡  
矣文獻之徵鄉邦爲重致臨安之舊志搜潛氏之遺編  
蠹簡重新鴻文不墜辛苦丹鉛之席阜牢著作之林讀  
書務益於身心後學實資其津逮蓋其生具夙慧家承

賜書課剛經柔史之程嚴矩步繩趨之志用能采善若菽制  
行如銅陰德比之耳鳴樸學根於心得獨善不殊乎兼  
善經師更重以人師職等居近芝蘭敬深桑梓頌流風  
而未沫懼潛德之不光坊表堪資羣推教不出家之效  
馨香永報願誦沒而祭社之文據實臚陳合詞籲懇伏  
乞詳請從祀鄉賢等情由縣府遞加事實冊結送司詳  
請核辦前來該臣看得錢塘縣已故內閣中書汪遠孫  
名列賢書職供內翰置言成範立行可模刊書籍以惠  
寒儒篤孝友而親宗族枕經胙史無慙稽古之名恤黨  
睦鄰夙著好施之譽著論有關世道立言足正人心凡

茲懿行之孔昭洵爲士林所矜式鄉評久洽

曠典宜邀據布政使任道鎔將事實冊結詳送

題請入祀鄉賢祠等情前撫臣梅啟照未及核辦移交前

來臣復核無異除冊結送部查核外臣謹會同浙閩總

督臣何璟浙江學政臣張澐卿合詞恭疏具

題伏乞

皇太后

皇上聖鑒勅部議覆施行謹

題請

旨

署浙江杭州府錢塘縣爲請入祀鄉賢事據杭州府紳耆吳兆麟等開送故賢汪遠孫事實理合造具清冊呈核須至冊者

計開

一故賢汪遠孫字久也號小米浙江杭州府錢塘縣商籍郡庠生中式嘉慶丙子科本省鄉試舉人兩應禮部試官內閣中書嗣以父沒弟幼里居不出道光十六年卒於家年四十有三

一故賢篤於內行十歲失恃事父與繼母以孝聞先意承志恆得歡心在京師聞父疾星奔歸里侍床疾親

湯藥者二年奉養繼母事事躬親人尤以爲難父沒  
有弟五人妹一人皆幼友愛彌篤延通儒課羣弟日  
以勤學勵志相敦勉嘗語人曰吾家子弟苟能砥礪  
讀書卽博一衿素願足矣傳貽至今科第不絕

一故賢生承平之世心存

君國恆曰吾學未優不可以仕四十入官未爲晚也家居  
遇捐濟之事必竭力報効易簣之前諄諄以忠孝廉  
節爲諸弟勗厥後水旱游臻軍務迭起諸弟遵遺言  
倡捐鉅款以佐賑務軍餉之不足咸豐庚申辛酉之  
難汪氏男婦殉難者一百四十餘人皆故賢之遺教

也

一故賢於敬宗收族尤加意焉先世自明季由徽遷杭  
歷二百年家無支譜乃叔修之族嫻之貧無依者按  
月周濟存活甚眾孤不能自立者設平陽家塾於芝  
松里延名師教之遊庠食餽者聯翩相望又別儲萬  
金歲納其息族嫻中婚嫁喪葬之事有不能舉者視  
親疏緩急而飲助之

一故賢持躬泊然而赴義若渴如古名臣先儒之祠墓  
遇有侈剝必請於大吏以時修葺凡養老育嬰清節  
義學諸善舉靡不捐助公車計偕不能成行者輒解

囊贈之至於周給貧乏調護士類眾善所歸不可悉數

一故賢蒐采文獻用力尤勤杭郡之志以南宋咸淳臨安志爲最古仿宋重雕使數百年墜簡晦而復彰厥功甚鉅名師益友苟有撰述必贊成之如梁履繩左通補釋陳奐詩毛氏傳疏汪家禧三祠志燼餘集吳顯

國朝杭郡詩輯吳振棫

國朝杭郡詩續輯或助刊或校訂皆得行於世他若屬鶚遼史拾遺東城雜記湖船錄則雕板以傳閭若璩尚

書古文疏證趙一清水經注釋朱彝尊詞綜杭世駿道古堂全集皆訂正補刊洵足以表章前哲嘉惠來學

一故賢自幼敏悟博極羣書先是本生曾祖刑部員外郎憲性耽古藉多蓄善本乾隆三十七年

詔徵遺書進呈六百餘種蒙

御題書苑菁華曲洧舊聞二種

頒賜佩文韻府全帙當時插架之富浙東稱范氏天一閣浙西稱汪氏振綺堂父刑部主事誠以故賢之好學也嘗指藏書謂曰他日以畀汝故賢閉戶劬書覃思攷

訂排日讀十三經注疏每有心得輯爲攷異嘗以抱經堂經典釋文尙多譌闕欲爲補正功雖未竟其宗尙已可概見著有國語古注輯存攷異發正凡三種漢書地理志校本二卷讀者歎其精覈借開生詩詞若干卷冲和純粹澹然無慕榮利之心蓋所養者深且厚矣

一故賢子一曾撰甫冠而歿子婦朱氏守節十七年咸豐十年二月城陷從容自盡十一年十一月城再陷嗣孫繩年又死之今以江西德化縣典史會事之長子鼎年爲後兄弟子姪現無仕九卿者

禮部謹

奏爲議覆鄉賢事禮科抄出浙江巡撫譚鍾麟等疏稱已故內閣中書汪遠孫置言成範立行可模請入祀鄉賢祠奉

旨該部議奏欽此欽遵到部查例開崇祀鄉賢該督撫學政每年八月前具題並將事實冊結送部詳覈於歲底彙題又崇祀鄉賢應詳駁事蹟倘名實不能相副及僅以人品學問空言譽美者卽行指駁等語又上年奏定章程嗣後各省鄉賢須俟其人身歿已及三十年方准題請等因在案今該撫送到事實冊內開已故內閣中書

汪遠孫浙江錢塘縣舉人幼失恃事父與繼母以孝聞有弟五人友愛彌篤敬宗收族嘗勸修支譜族姻之貧無依者按月周給存活甚眾婚嫁喪葬之事悉傾助之並設家塾於芝松里延名師以教族中之孤不能自立持躬泊然而赴義若渴於古名臣先儒諸祠墓遇有陟剝必請於大吏以時修葺凡養老青嬰清節義學諸善舉靡不捐資以助嘗排日讀十三經注疏每有心得輯爲攷異又著有國語古注輯存考異發正凡三種漢書地理志校本二卷等語<sub>臣</sub>等公同查覈該撫請將汪遠孫入祀鄉賢祠之處係屬名實相副身歿年限亦屬相

符謹擬准其入祀鄉賢祠恭俟

命下<sub>臣</sub>部行文該撫遵奉施行所有<sub>臣</sub>等遵議緣由謹援照成案改題爲奏爲此謹

奏請

旨光緒六年十二月十六日奉  
旨依議欽此

旌表節烈錄

湖北巡撫臣彭祖賢片

奏據天門縣知縣邵世恩等稟稱同鄉節烈婦汪朱氏係汪迪孫之妻夫故時氏年二十八歲矢志守節撫遺腹子曾事仰事俯畜人無閒言咸豐十年二月粵匪竄犯杭城氏麾僕命攜子出城陷自投於井以殉難時有已適孫姓之女歸寧在家亦挈其十二歲之女同時投繯殉難又節烈婦汪朱氏係汪曾撰之妻夫故時氏年十九歲誓以身殉家人環守獲免咸豐十年二月杭城陷氏率其僕婦陳氏投繯而死均因戶族遠官在外久未

舉報該員等誼屬梓鄉見聞既確不忍聽其湮沒造具事實清冊由天門縣知縣邵世恩出具印結呈請具

奏前來臣查浙江錢塘縣節烈婦汪朱氏等俱係志秉坤貞躬遭蹇阨寡傷黃鵠劫遇紅羊旣大節之流芬實舍生而取義足光彤史謹籲

恩綸除冊結送部外理合會同湖廣總督臣涂宗瀛湖北學政臣高釗中附片具陳伏乞

聖鑒訓示謹

奏光緒九年三月十七日軍機大臣奉

旨均著准其旌表禮部知道欽此

湖北安陸府天門縣知縣請將浙江錢塘縣節烈婦汪迪孫之妻朱氏汪曾撰之妻朱氏事實造具清冊呈請鑒核須至冊者

計開

汪迪孫之妻朱氏事實

一故婦系由原任廣東糧儲道嘉興朱達吉之女其舅則原任刑部主事錢塘汪誠也幼稟母教女紅之外喜讀列女傳唐詩訓女遺規恆得親歡于兄弟姊妹則親愛無間二十一歲于歸汪氏爲迪孫妻舅早逝世事姑相夫肅肅雍雍道光十五年九月夫以末疾

殞時婦年廿八育女三慟不欲生妯娌勸慰之曰似續爲重有遺腹在必產男也慟稍釋逾三月果舉一子撫養成立咸豐十年二月殉難于家年五十有三

一故婦明大義輕貲財夫病之日告婦曰杭族貧無以爲葬者不少吾欲葬之而恐不逮夫沒後乃稟命于姑願成夫志捐白金五千兩飲貧族以葬姑許之復請夫之昆弟經理其事于是屬貧族無力舉葬之子弟購地選期每葬一棺助費四十金計葬一百數十棺汪氏死者一時咸得安土焉

一故婦節而烈者也咸豐庚申二月十九日粵匪犯杭

二十七日婦聞城破屏去子女自投于井三月三日城復撈尸出七孔流血面如生殮葬橫山當破城之際其子曾事侍奉在側婦曰我衰且病萬無生理爾係遺腹所生須爲似續計死則無益生乃是孝其速避會事不離左右婦命二僕強昇出故得免於難

一故婦教育子女不逾義方延師誨子造就成人補杭郡庠生現官江西萍鄉縣蘆溪巡檢適孫氏女自金華歸寧居數月寇至城危婦諭女及媳徐氏曰我誓必死爾可避則避不能避則死毋污名節皆伴諸潛至後園空室其女先以繩授十二齡女敏姑以殉繼

卷四  
將三齡子永齡投諸水從容自縊其媳亦以四齡子松年置之池中同縊于室氣不絕爲鄰人救免及曾事與堂兄曾唯曾復隨大兵恢復城池收殮諸尸事畢知徐氏死而復甦赴鄰舍視之兩目盡赤頭有繩傷神氣恍惚語言糊塗醫治數月始愈男守詩書女知禮義蓋故婦平日之訓也

汪曾撰之妻朱氏事實

一故婦汪朱氏歸安訓導錢塘朱瑞楷之女內閣中書錢塘汪遠孫之媳年十七適曾撰爲室越兩歲道光二十四年六月曾撰死婦哭之哀屢欲殉家人環守

而不獲守節十七年至咸豐十年二月城破殉難年三十有五

一故婦之舅中年先沒姑亦早世婦不及侍奉每逢忌辰祭祀必誠事兩親至孝婦在日其父爲諸生貧甚乃菲于自奉竭力以養嫁妹乏貲婦炊以衣飾又爲弟朱世俊入貲官魯以養父母戚黨咸以孝友稱之一故婦無子以守正之長子繩年爲嗣性敏而剛強婦延嚴師教讀入則訓以義方管束維謹十歲五經誦畢人以爲慈母而兼嚴父云

一故婦之節烈出于至性咸豐庚申二月粵匪突自廣